

PWÂRTEÛ D' PAKÈT

(Bokèt foû do roman “Èrotikes Walonaedjes”

(...)

Dji duvéve aler dsus mès sèze ans. Sins m' vanter, dji n'èstéve nén trop mau fait èt dèdja Bén bati; d' m' awè mètu au dju-djitsu mi fiéve do Bén. Dji boutéve po l' patro do vilâdje èt l'zeu mète di skwère ène pitite gazète avou lès eures di raplou èt lès ptitès novèles ki l' vikère voléve fé sawè à tos lès mimbes èt à leûs parints. Come l' abé èstéve on grand brake todi dsus tchamps dsus voyes - s' tchofe-tchofe di moto inte sès djambes- po voye sès pratikes, i m' faléve li doner étou sovint à l' vièsprêye on fwart còp d'mwin po lî mète à djoû sès papîs èt fé dèss commissions à s' place.

C't'après none la, i m'avéve èvoyî cwèri on pakèt au “Tchéstia”. Po dire li vraiy, c'n' èstéve nén on tchéstia come do tins do vî tins. C'èstéve pus rade ène bèle, grande ritche maujone èvou vikève l' indjineû do tchèrbonâdje. Veuf dispû sakants anêyes, i n'avéve nén dmèré lontins tot seû à z-î ptit-djuner avant d' ènn' aler fé s' bouye à l' fosse. Enfén, c' èst c'ki dj' a ètindu raconter.

Todi èst-ce t-i ki c' djoû là, l' comère ki m'a fait rintrer n' duvéve nén ièssè branmint pus vîye ki mi.

- Chûvèz-m', m' a-t-èle dit; m' n' ome n'èst nén la èt i va falu ranchî po trover c'ki vos faut. Dj'a gripé lès montêyes d' drî lèye èt sayî di n' nén trop riwêti comint sès rondès fèsses fyîne boudjî s' tène rôbe di tchambe tot djuste à rêze di mès ouy. Èle a dovièt l' uch d' on burô.

- Alèz don vîre là-ddins èt î trover c'ki vos faut. Dji n'a nén yeu a ranchî. L' pakèt ratindéve dsus ène tchèyère, min.me k' on poléve î lire, è grandès lètes : “Po Mossieu l' vikère”. Dji l'a apicî èt m' ritoûner. Dj' èstéve tot seû !

- Avèz trové ?

L' vwè vinéve do coron do colwêr. Dji m' a avancî djusk'a ène uch dimèrêye à craye èt passer m' tièssè.

- Oyi. Min.me ki c' n'èstéve nén malauji. Bén dèss mèrcis. Dji m' èrva, a-dj' di. - Èstèz prèssé ? N' ratindèz nén ène miète ? P'tète k' i gn'a ène sakwè ki l' indjineû voléve co lî dire, à vosse n'abé. Vinèz don vèci.

Dj'a poussé l' uch èt avancî ène miète. C' èstéve si tchambe. Achîde dsus l' lét, l' comère s' astokéve a dèss spès cossins. Dji n' a nén wazu muchî pus lon.

- Avèz peû d' mi ? I gn'a nén d' kwè. Vinèz don vèci. On l' va ratinde à deus. Mètèz vos don, la, au pîd do lét. I gn'a assèz d' place.

L' èst vraiy ki po dèl place i gn'avéve dèl place. L' matrasse avéve dut ièssè fabriké dsus comande. Sûr k' i fiéve li dobe do cia di mès parins. On aréve polu à kat î dwarmu au laudje. Padzo dèss rodjassès covêrtès, dèss riglatchants linçous èstfîne rôzes. Dji n' avéve mauy vèyu çoula. Lèye, èle fiéve chénance di passer on pigne dins sès blonds tchvias. I duvéve kan min.me î awè dèss nukès didins pask' a atanawète èle fiéve ène drole di ptite grumace tot lèyant passer s' linwe inte sès lèbes.

“Dèss rodjès cèrîjes, k' dji m' a di à mi min.me, dèss cèrîjes autoû d' blankès pièles.”

Èle avéve l' aîr di n' nén awè sogne di mi, s' racrapotant dins sès cossins tot n' chénant nén vîre k' pa momint sès tot lèdjîrs moussémints n' fyîne ki wêre baurîre èt m'lèyî louker.

Li v'la ki m' dimande : “Èst-ce k' i gn'a lontins k' vos frékéntèz , dijèz-m' ?”

- In, kwè ? a-dj' résondu. M' sintant tot bièssè èt comincî à m' sinte frèche di tchaud.

- Alèz, vos l' ploz Bén mèl dire. Avèz ène pitite comère ? Èst-ce k' èle èst pus bèle ki mi ?

- B-b-bén n-n-non, lî a dj' bèguèyî. I gn' a pont d' fêye au patro.

Èle a pèté d' rîre. S'pwètrène tryanéve tant padzo l' tène corzâdje di s' tchimîje ki dj'a vèyu

on
mamuron m'
fè one
clignète.

One sonète
s'a fait
ètinde...



On comache todi...